

# TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

*"E ao to te taata, aore e faaau i to'na haerea i te a'o a te paieti ore, aore i taahi i te e'a o te feia rave hara ra, e aore hoi i parahi i te parahiraa o te feia tâhitohito ra." Sal. 1: 1.*

Nu. 2.

10 Novema, 1910.

Mat. 4.

## E Taime to te Mau Mea Atoa Nei.

"E taime to te fanau, e taime to te pohe; e taime to te tanu, e taime to te iriti i tei tanuhia ra." Koh. 3: 2.

⑥ TE parau teie ta te orometua paari ta Solomona i haapii mai i to te ao i to'na ra anotau, e ua vaiihohia ia no tatou paatoa i teie nei anotau hopea nei. Te haapii mai nei teie nei irava tumu e, e taime to te fanau, e taime to te pohe. Oia mau. Ua fanau mai tatou paatoa i roto i teie nei ao, e eita maoro e ho'i faahou ai tatou i te vahi no reira mai tatou, oia hoi e roohia mai tatou e te taime no te pohe. Uiraa: No hea mai to tatou nei tino, e to tatou nei varua ia tatou i fanau mai? Pahonoraa: No ô mai i te Atua ra to tatou nei varua; no ô râ i te repo to tatou nei tino. A hi'o i te Koheleta 12: 7. Inaha, te faaite papu mai teie nei irava e, ia pohe ai tatou, e ho'i to tatou nei tino i te vahi no reira mai oia ra, e ho'i râ te varua i te Atua ra i horoa maira. E no reira ua papu tatou e, ua faafanau mai te Atua ia tatou paatoa. Ua hamani ihora oia i te tino i te repo fenua; te varua râ, ua haapuai mai oia i te reira i roto i to tatou nei apoo ihu, e ua faarirohia to tatou tino

nei ei tino ora. A hi'o atoa i te Malaki 2: 10. E ui faahou tatou, no te aha i tuuhia mai te taime no te pohe? Pahonora: No te hara o to tatou tupuna o Adamu, i tuuhia mai te taime to te pohe, o te utua ia no te hara. No te hara o te hoê i tae mai ai te pohe, e no te haapao maitai o te hoê i tae mai te tia-faahou-raa mai mai te pohe maira. 1 Kor. 15: 2-22. Na Paulo teie nei parau i papai i te haapiiraa'tu i to Korinetia e e parau mau roa. E te tumu o te tia-faahou-raa, o te Mesia ia, i hope râ te taata i te pohe ia Adamu, e hope atoa i te faaorahia i te Mesia ra.

E ui tatou. E tanu tatou i te aha i te taime to te tanu ra? Pahonora: A tanu tatou i te huero o te varua, oia hoi te maitai; eiaha roa râ tatou e ueue i ta te tino, no te mea o ta tatou e ueue ra, o ta tatou e ooti mai. Gal. 6: 7, 8. Inaha, te faaite papu ra Paulo i to Galatia na roto i teie nei na irava e, eiaha e vare e ore te Atua e noaa i te haavare, o ta te taata e ueue ra o ta'na â ia e ooti mai. O te ueue i ta to'na i ihora tino, o te pohe ta'na e noaa i te tino ra; e o te ueue i ta te varua ra, o te ora mure ore ta'na i noaa i te varua. Oia atoa i te pae o te tino nei; ia tanu tatou i te huero maitai i roto i to tatou nei mau aau e ia vai maitai â e iriti mai ai tatou i te maa maitatai na roto i te reira. Ia tanu râ tatou i te huero ino e pe noa i raro i te repo, e ore e tupu mai ai. Ia ueue tatou i te huero parautia i roto i to tatou mau ohipa i te paeau o te varua, e ooti mai tatou i te ora mure ore ia tae te tau ahune, oia hoi i te mahana faautuaraa. Ia ueue tatou i te huero o te ino ra, o te pohe ia ta tatou e noaa ia tae mai taua mahana ra. No reira e au mau hoa e, a rohi, a faaitoito tatou i te ueue i ta te varua, eiaha roa ra i ta te tino ra. Mas. 11: 18, 19.

—ISAACA.

“Aita a te Fatu ra a Iehova e peu i rave maori râ ia faaite i ta'na parau i moe i tana ra mau tavini i te mau peropheta. Ua uâ te liona, o vai te ore e mätä'u? ua parau te Fatu ra o Iehova, o vai te ore e tohu?” Amo. 3: 7, 8.

Te Parau Tuatapapa no  
Iosepha Semita.

(TUATIRAA.)

PENE II.

MATAHITI 1820.

*Te feruri noa ra o Iosepha i te mau haapaoraa. Tapitapi a'era to'na mana'o ia ratou, aita i papu teihea te ekalesia e tia ia'na ia amui atu. Ua noaa ia'na te maramarama no roto mai i te Bibilia. Ua pure oia i te Atua. Ua ite oia i te hoê orama hanahana rahi.*

E TAE a'era i Iosepha i te ahuru ma maha i to'na matahiti, o te taima mau ia te reira no te mau amuiraa a'oraa evanelia no te mau ekalesia Porosetani. E tamaiti tino rahi e te itoitohi, e te feruri noa ra oia i to'na mana'o. Ua hi'opoa oia e te tahi atu â mau melo no te utuafare atoa i te mau haapaoraa; e ua mana'o a'era oia e, e mea tia roa ia amui atu i te tahi ekalesia ia noaa ia'na te ora. Area râ teihea te ekalesia mau? Tapitapi roa to'na mana'o i taua vahi ra. Ua mana'o a'era te tahi mau melo no te utuafare ra o te tufaa ekalesia Porosetani o tei parauhia Pereseberiana te haapaoraa mau, e ua tomo te metua vahine ra o Lute, e Haeramu, e Samuela, e o Sopheronia i roto i taua ekalesia ra. Peapea rahi roa te mana'o no Iosepha i te reira, no te mea ua papu hoi to'na mana'o e, o te tufaa ekalesia Porosetani o tei parauhia Metodi te haapaoraa mau, e e mea au ore roa teie nei na haapaoraa te tahi i te tahi. Aehuehu roa a'era Iosepha no te mea te vai noa ra te mana'o i roto ia'na e eiaha parahi noa, a rave â i te ohipa tia ia noaa te ora. Area râ aita a'era e taa ia'na teihea ihora te mea tia ia rave. Ua papu roa to'na mana'o e e ere teie nei mau ekalesia te mau haapaoraa mau; ahiri no te Mesia ra ratou, ei tauturu hoi te tahi i te tahi, eiaha râ e hamani ino te tahi i

te tahi. Ua mana'o a'era oia e, eiaha e tomo i roto i te tahi ekalesia maori râ ua ite papu roa oia e, o te haapaoraa mau te reira; no te taa ore o to'na mana'o, ua faaea noa ihora oia.

Ua tae ia Iosepha i te ahuru ma maha i to'na matahiti; aore oia i haapii-rahi-hia, area râ ua ite i te taio i te Bibilia e ua feruri noa ihora oia i te mau parau mau e rave rahi i roto i te reira. Teie hoi ta'na peu i rave na, maori râ ia hi'opoa mai te feruri maite i te mau haapiiraa o te mau orometua o tei tamata noa na i te faafariu mai ia'na ra i ta ratou iho mau haapaoraa, e te mau haapiiraa no Iesu e te mau aposetolo hoi. Ei reira ua feaa ihora to'na mana'o ia ratou no te mea ua ite na oia e e mea au ore ta ratou haapiiraa i tei papaihia i roto i te Bibilia. Fifi roa'era to'na mana'o, area râ i te hopea ra ua iteahia te e'a afaro e ana. Te taio noa ra oia i te Bibilia, e ua ite oia i te tahi irava parau au roa ia'na, e te feia atoa hoi o tei imi i te maramama ra. Teie hoi taua parau ra, tei te pene hoê e te irava pae no Iakobo. Na ô hoi te taioraa:



TE HOHO'A TEIE NO TE PEROPHETA  
RA O IOSEPHA SEMITA.

*"Te ere ra râ te hoê o outou i te ite, e ani oia i te Atua ra, o tei horoa hua mai i te maitai i te taata atoa ra, ma te patoi ore; e e horoahia mai ta'na."*

Putapû roa a'era to'na aau, e ua feruri noa ihora Iosepha i taua parau ra; e i muri iho ua papu roa to'na

*transcribed  
corrected*

*to be finished*

mana'o e, e haapao, e e pure hoi i te Atua ia noaa ia'na te ite, no te mea te vai poiri noa ra oia. Te na ô maira tei papaihia ra, "e ani râ oia ma te faaroo, eiaha e feaa," ia hinaaro i te maitai no ô mai i te Atua ra. Ua taio paha Iosepha teie tau irava no te mea ua papu roa to'na mana'o e, e ani oia ia noaa i te ite, no reira ua oaoa a'era oia e ua tiaturi i te Atua ra, e e horoahia mai ta'na.

Tei te poipoi, tei te pae matamua i te haamataraa no te tau mahanahana i te matahiti 1820. Ei i taua mahana ihora aore e ata i nia i te ra'i, e e mea haumâru te mata'i, e te anaanaea, e e mea nehenehe roa te mau mea atoa i te mau vahi i rapae. Ua haaati-roa-hia te utuafare no Iosepha ma i te uru raau heeuri. Ei reira ua haere atura oia i roto i te vahi uru raau, e tae a'era i te vahi i mana'ohia, ua ite oia i te tahi vahi maitai, hi'o atura aore roa e taata i iteahia e ana. Ei reira ua tuu ihora Iosepha i ta'na turi i raro, e ua pure i te Atua ra. Aita i mahia i te reira, ua tapea-roa-hia to'na arero i te hoê mana rahi hi'o-ore-hia; e ua haapoiri-roa-hia te mau mea atoa nei ia'na, e ua mana'o a'era oia e ua fatata oia i te pohe. Ua ite râ oia e, o te mana hoi teie no te varua ino; ei reira ua faaitoito hua, e ua tiaoro atu oia i te Atua ia faaora mai ia'na. Te pau noa ra to'na puai, e ua paruparu atoa to'na mana'o, e inaha, ite atura oia i te hoê pou maramarama rahi o tei hau roa'tu i te anaana o te mahana i te avatea mau ra, i te taeraa mai ia'na ra. Ei reira ua faarue ihora te arii mana no te poiri ia'na. Ite atura Iosepha i e toopiti pue taata, oia hoi te Atua Metua, e i ta'na ihora tamaiti o Iesu Mesia, i roto i taua pou maramarama ra ma te anaana e te hanahana rahi roa faito ore, aita hoi e tia ia faaite atu i to raua huru hanahana mau. I ta Iosepha hi'oraa'tu e hoho'a tia roa te tahi i te tahi, aita e huru-ê-raa e vahi iti noa'e; e to raua anaana, e te mana hoi, ua faito-atoa-hia ia. Teie râ, ua parau mai te tahi, na ô maira, "E Iosepha, tau tamaiti here teie, a faaroo ia'na." "Teie hoi te tumu ua pure atu vau i te Atua ra, oia hoi ia

ite vau teihea te haapaoraa mau e tia ia vau ia amui atu. No reira ua ani atu vau i e pue taata toopiti tei roto raua i te maramarama i nia' e ia'u, teihea te haapaoraa mau? Ua na ô maira tei parau mai ia'u, 'Eiaha oe e amui atu i te hoê o ratou, no te mea ua hape ratou atoa ra, e ta ratou mau haapiiraa tumu e mea faufaa ore ana' e ia i mua ia'u, e to ratou mau orometua ua hapa ê ratou. Te faatura mai nei teie nei feia ia'u i to ratou utu, area to ratou aau tei te atea ê ia'u; te haapii nei ratou i te parau i tuuhia mai e te taata ana' e ra; e huru paieti hoi to ratou, area te mana no te reira, ua hunahia ia e ratou.' Ua faaue faahou tei parau mai ia'u, 'Eiaha oe e amui atu i te hoê no te mau ekalesia; te vai ra te tau e hena mai te evanelia mau ia oe na.' E e rave rahi atu â mau parau ta'na i haapii mai ia'u, aore hoi e tia ia papai mai i teie nei. Ei reira te maueraa'tu i e vetoopiti pue taata, e ua moe ihora taua orama ia'u."

E i muri iho, ua ite Iosepha e, te taoto noa ra oia i nia i te fenua nei, e tei tiatono maite oia i nia i te ra'i ra; i a'era râ oia i te oaoa e te hau, no te mea ua ite na oia e, te vai ra te tau e haapiihia oia i te ravea e ora'i oia ra. Ua ite papu ra Iosepha e, te ora nei te Atua Metua e i ta'na ihora tamaiti ia Iesu Mesia. E e tino mau to raua, mai to'na ihora tino i te huru ia hi'o noa'tu. E ua ite atoa oia e, ua here mai raua ia'na, e ua hinaaro raua ia'na, e ua here atoa oia ia raua. Tia a'era oia i nia, e ua ho'i atu i te utuafare, e te vai noa ra to'na mana'o, tei ia'na te parau oaoa no te mau taata atoa, e ua mana'o a'era oia e, e farii mai ratou i te reira ma te oaoa rahi.— VILIAMU SETEMILA.

(E tuatihia mai teie parau.)

“E inaha, reva'tura te melahi i parau mai ia'u ra; e ua haere ihora te hoê melahi ia farerei atu ia'na, e ua parau atura ia'na, A horo, a parau atu i tera ra taata apî na, e na ô atu. E parahihia Ierusalema e tae noa'tu i roto i te mau oire rii, i te rahi o te taata e te puaa i roto ra.” Zek. 2: 3, 4.

## Pahi Reva

TE ora nei te tahi taata i te fenua ra o Purutia i Europa o Ferdinand von Zeppelin to'na i'oa. E taata feruri mana'o hohonu i te imiraa i te mau ravea apî e maitai ai te taata nei. Teie ta'na ohipa, hamaniraa pahi reva, e e rave rahi tei oti i te hamanihia e ana. E taata paari, e ua tae oia i te 72 o to'na matahiti, e te rave noa nei oia i te ohipa faatere hamaniraa pahi reva i teie nei â. I te matahiti i mairi a'e nei, ua faaterehia to'na pahi Zeppelin piti, e tei roto ia'na na taata toovau i te maueraa na ropu i te reva. Ua mauue noa oia e 36 hora, e ua tere 850 maile, aore i faaea, aore i pou i raro, aore hoi i roohia i te hoê peapea. Hi'o a'era te hui raatira i taua maueraa faahi'ahi'a, tupu a'era to ratou oaoa i te rahiraa, e ua horoa ratou i te moni haamauruuru noa 1,500,000 dara ei tauturu ia'na i ta'na ohipa hamaniraa pahi reva.

Mai teie te huru o to'na pahi reva. E au taua pahi ra i te tahi baero e 400 e tiahapa pie i te roa, e ua tapeahia i na tapea 16 mai te tapea auri baero nei i te huru, e e 26 pie te atea teie nei mau tapea auri te tahi i te tahi. Teie mau tapea auri tei rapae au ana'e i te pahi. Tei roto i te pahi te mau pou turu mai te tahi hui pereoo taataahi i te huru. Tei roto i teie nei pahi na piha 17. Te vai nei hoê opupu matai i roto i te mau piha e hope roa'e. E e tia teie nei mau opupu mata'i (gas) ia afai i nia 25,000 paunu. Teie te teiaha no teie nei pahi, oia hoi 19,000 paunu. Ua hamanihia i raro a'e i te tino pahi na pereoo e piti, hoê i na hopea e piti no te pahi, mai te boti nei te huru i te hi'oraa. Mai te mea ia mairi noa te pahi reva i nia i te pape, e aore râ i nia i te miti, e panu noa oia i nia i teie nei na pereoo tei haamauhia i raro a'e ia'na. Ia mairi noa te pahi, e ia û i nia i te fenua nei, te vai nei na pute i haamauhia i raro i na pereoo ei paruru ia'na ia ore oia e ino noa i te reira. Teie te faito o na pereoo e piti o tei haamauhia i raro a'e i te tino

pahi, oia hoi 26 pie i te roa, e e 4 pie e te afa i te teitei, e e 4 pie e te afa i te aano. Ua hamanihia te tahi tahua, e te tahi piha raveraa ohipa, e te tahi mau piha taоторaa i ropu i na pereoo e piti, i raro a'e i te pahi. I ropu mau i te pahi ua hamanihia te tahi e'a o te tae i nia, e te vahi teitei roa teie no te pahi, e te vahi i haerehia e te mau feia ratere ia mataitai noa ratou i te mau mea i raro, i nia i te fenua nei. Tei roto i na pereoo e piti i raro a'e i te pahi na machine faatere, e e au te puai o te machine hoê i na puaahorofenua 85. E e tia te machine hoê ia faatere i te pahi na ropu i te reva 33 maile i te hora hoê. Ua haamauhia na pererau i faaauhia no te maueraa i te pae muri no te pahi. E te vai atoa ra na hoe faatere i te tahi pae e i te tahi pae. Tei mua te hoê hui auri, e ia faaohuhia i te reira e te machine e faatere te reira te pahi mai te boti i faaterehia e to'na hoe. E te vai atoa ra te tahi hoe faatere i te pahi i nia, e i raro i te tahi pae e i te tahi pae mai ta'na e hinaaro. Te parahiraa no te ratira rahi faatere tei roto i te pereoo i mua i raro a'e i te tino pahi; te vai râ te parau niuniu i roto i te mau piha e hope roa'e, no reira aita e peapea ia faaue noa oia i te mau taata rave ohipa e te mau taata faatere i raro a'e ia'na. Ia faaea te pahi i nia i te fenua nei, e tuu ratou i te tutau i nia i te fenua, ia ore te pahi ia hauti-noa-hia e te mata'i. Ia faaea te pahi i nia i te pape, e tuu ratou i te tutau i roto i te pape, ia ore te pahi e panu noa. —W.

Ua tupu te orure hau i te tufaa fenua ra o Portugal i Europa. Ua riri roa te hui raatira i to ratou arii apî, o Manuel, no te mea ua hinaaro oia i te tahi vahine purotu, e te faahi'ahi'a, area râ ei vahine oriraa oia. E ua aratai oia ia'na i roto i te fare arii e parahiraa na'na. E ua parauhia ua haamâua noa hia 500,000 dara i te hooraa i te mau mea ta'na i horoa noa ia'na. E i muri a'e, ua tama'i te hui raatira e te nuu no te hau. E ua pau te nuu no te hau. Ei reira horo atura te arii e te utuafare arii atoa i nia i te hoê manuâ Beritani, e ua haere roa i Beritani e parahi ai. E ua faatiahia e te hui raatira te hau repupirita i te mahana 11 no Atopa. E ua maiti ratou ia Theophile Braga ei peresideni matamua no to ratou hau apî.

## Te Poheraa no Tagaroa a Tetopata.

**E** PERESIBUTERO oia i roto i te Ekalesia a Iesu Mesia i te Feia Mo'a i te Mau Mahana Hopea Nei, i Hikueru. Ua mau maite oia i te faaroo e tae noa'tu i to'na poheraa. I pohe oia i te 20 no Tetepa, 1910. E poheraa maitai to'na. Ua parau atura vau, "E Tagaroa." Ua parau maira oia, "Eaha?" "Eaha to oe huru?" Ua parau maira oia, "I te aha?" Ua parau atura vau, "To oe huru i teie nei." Ua parau maira oia, "Te ineine nei au." Ua parau atura vau, "Mea papu?" Ua parau maira oia, "E." Ua parau atura vau i na tamaiti, "A faanehehe tatou ia'na." E oti a'era ua parau atura vau ia'na, "E Tagaroa, mea papu anei to oe mana'o i te faaroo i te Fatu?" Ua parau maira oia, "Mea papu roa, e te maramarama maitai." Ua parau atura vau, "Te ite nei oe i te e'a?" Ua parau maira oia, "E, ua ite au te vai noa maira ia." Ua parau atura vau, "Tagaroa, nafea?" Ua parau maira oia, "Taime rii, taime rii ihora matou." E i muri ihora, ite atura vau i to'na huru. Ua toro maira oia i to'na rima a aroha mai ia'u. Ua haru atura vau i to'na rima, aroha'tura ia'na. Ua parau maira oia ia matou atoa, "Faaitoitou outou." Ua parau maira, "Ia ora na outou." Ua parau atura vau ia'na, "Ua ineine anei oe?" Ua parau maira oia, "E." Ua pure atura vau i te Atua ia arataihia oia i roto i te faaeearaa ma te hau. Ia oti te pure, ua hi'o matou i to'na huru, e au ia i te varea taoto rahi. Te porohia'tu nei outou e te Feia Mo'a i te mau vahi atoa ia haamana'o i teie nei mau huru poheraa tura rahi, e te hanahana. Tei roto ana'e i te Ekalesia a Iesu Mesia i te Feia Mo'a i te Mau Mahana Hopea Nei, te itearaa te reira huru, no reira titau maite tatou i te reira na roto i faaroo i te Atua Torutahi, e te auraro i te Ekalesia.

Papaihia e TANE TETOKA A TEHIVA.

---

A faaite atu i TE HEHEURAA APÎ i to taata tupu.

## Te Mau Parau Api.

Ua haapae ihora te taata ra o Roland Moeller no te oire Denver, i Amerika, i te maa e 57 mahana. Teie te tumu i na reira'i, ua imi oia i te ravea e ora'i to'na ra ma'i piritia.

Ua haere atura Viliamu, i te 30 no Tetepa, i te fenua ra o Makatea. Parahi ihora oia i reira e toru hebedoma. Ua farii-maitai-hia oia e te taata i reira. Manu'ia a'era to'na tere. E i oti ta'na ohipa i reira, ua ho'i mai, mai te maitai e te mauuruu.

I te mahana 29 no Atopa, ua tapae mai i Papeete nei te pahi rahi auahi Niu Zilani "Aoragi." E ao a'era ua reva'tura oia i te fenua ra o Amerika. I parauhia e tere noa na pahi auahi Niu Zilani e piti i te mau avae atoa i teie matahiti i mua nei, e e tere roa raua i te oire ra o San Francisco, na Tahiti atu i te tere.

I te 20 no Atopa, ua hamani te hoê sotaïeti hoo û puaatoro i Amerika i te tahi pata paari (cheese) no te tahi hi'oraa rê (exposition) o tei faa-terehia i reira, ei hi'oraa. Teie to'na teiaha, oia hoi 4,000 paunu. E teie to'na faito, oia hoi e 4 pie i te teitei, e 15 pie i te aano. Te pata paari teie ua hau i te rahi i teahia i te ao atoa nei.

I te 18 no Tetepa, ua tunu na metua i te fenua Amerika i te hoê punu rahi ti. E i muri a'era, ua ninii raua i taua ti ra i roto i te tahi farii rahi vairaa ti, e ua afaihia'tu taua farii ra i rapae au i te fare a vai ai ia faa-toetoehia. E muri iti a'e, haere atura ta raua tamarii nainai i pihaiho i taua farii ra. Topa oia i roto, pohe roa ihora. Inaha, i te ho'iraa mai o na metua, ua ite raua e, ua pohe roa oia. Ote roa ihora raua ia'na.

I te 29 no Tetepa i mairi a'e nei, ua faatere te hoê taata apî, o Walter Brookins i to'na pahi reva, mai te oire Chicago e tae noa'tu i te oire ra o Springfield i Amerika. E area roa tei ropu i taua na oire e piti ra, oia hoi 187 maile. Teie ra te taime ua pau ia'na i to'na maueraa i taua vahi roa oia hoi e 5 hora, e e 44 minute. Ua riro te rê moni ia'na hoê ahuru tausani dara. I parauhia ua mataitai hoê milioni taata i taua maueraa faahi'ahi'a no'na ra.

Te haere nei te mata'i rii e 5 maile i te hora hoê; e te mata'i rahi i 40 maile i te hora hoê; e te puâhi'ohi'o rahi roa e 90 maile i te hora hoê. I te huri haereraa o te ao nei i rapae au i te mahana e roaa ia'na 66,000 maile i te hora hoê. E i te huri haereraa o te marama e roaa ia'na 2,273 maile i te hora hoê. Te haere nei te uira (electricity) i nia i te taura niu-niu 22,360 maile i te tetoni hoê. I parauhia e te taata paari te haere nei te maramarama 186,770 maile i te tetoni hoê. E maere te mana'o i te feruriraa i taua mau mea nei.

Ua faaite William R. Hearst, te hoê taata moni rahi i Amerika, i roto i to'na vea, e horoa oia 50,000 dara i te taata matamua o tei maue i roto i te tahi pahi reva mai te oire Niu Ioka e tae atu ai i te oire ra o San Francisco i Tarafonia. E area roa teie e 3,000 maile.

Ua hamanihia na pereoo uira 80,000 i roto i te hau Amerika i teie nei matahiti i mairi a'e nei. E teie te moni e noaa ia oti ratou atoa i te hoo-hia, oia hoi 240,000,000 dara. Teie te rahi o te mau huru pereoo puahorofenua i hamanihia i reira i teie nei matahiti i mairi a'e nei, oia hoi 1,700,000.

Ua horoa mai te Emepera Rusia, i te 10 no Tetepa, i te moni 40,000 dara ei tauturu i te hamaniraa i te tahi fare pureraa no te mau taata Rusia o tei parahi i te oire ra o Passaic i te mataeinaa ra o Niu Jersey, i Amerika. E ua mauruuru ratou atoa ia'na i te reira. I parauhia e pau 120,000 dara i te hamaniraa i taua fare ra.

Te parahi nei te hoê taata paari i Amerika, o Edison to'na i'oa. E taata mana'o hohonu i te imiraa i te mau ravea apî. Ua na ô mai oia ia mairi e 10 matahiti, e ravehia te pahi reva ei afai i te vea, e te mau tao'a ua rau i te huru, i tera vahi e i tera vahi. E te mana'o nei oia e riro ratou i te tere e 100 maile i te hora hoê. Mai te uira i te peeraa ia tae i taua tau ra.

Ua tupu te tahi ati rahi pereoo auahi i te 22 no Tetepa, i te tufaa fenua ra o Kansas, i Amerika. No te pape pue ua pau te e'a turu pereoo auahi i nia i te tahi anavai pape. Ua faaterehia te mau pereoo auahi e te raatira, e tae a'era ratou i taua vahi ra, mai te ite ore e, ua pau e na te e'a turu. No te puai o te haereraa a tae i taua vahi ra, aita e ravea ia tapea oioi i te mau pereoo auahi. Ua topa na pereoo e toru i roto i taua vai pue ra, e ua pohe roa na taata 16, e e rave rahi te taata ua pêpê ino roa to ratou mau tino. E te tahi mau tino pohe, ua panu noa i taua pape ra.

I te hora hoê i te poipoi t te hoê no Atopa i te oire ra o Los Angeles i Tarafonia. Ua pau te tahi fare rahi ofai, tahua ono, neneiraa vea, i te paura e te auahi. Ua tuuhia te tahi poro rahi paura i raro a'e i taua fare ra e te enemi. Na'na iho i tutui, e ua haruru, parari a'era te fare, e i muri iti a'era ua ura i te auahi, pau ihora. Ua pohe roa 20 taata rave ohipa i roto ia'na. E ua pêpê ino roa te tino o te mau taata e rave rahi. Ua ou'a i raro te tahi mau taata no nia mai i taua fare ra i roto i te tahi upea i tuuhia e te taata i raro, ora'tura ratou. Aita hoi i tano te ou'araa no te tahi mau taata a ou'a'i ratou i raro, e ua û ai i te ofai, pohe roa ihora. Teie te moni ua haamâua-noa-hia i te paura o taua fare ra, 500,000 dara. Aita i iteahia i teie nei â o vai ra te taata i rave i taua ohipa ino ra.

## TE E'A PAHI RA I PANAMA.

Ia hi'o outou i to hoho'a fenua, e ite ai outou i te hoê tufaa fenua oaoa i ropu i na tufaa fenua rarahi i parauhia Amerika Apatoerau e Amerika Apatoa. O Panama te io'a o taua tufaa fenua nainai ra, e te tufaa fenua atoa ia i haamatahia te ohipa tapuraa e'a pahi rahi e te hau Amerika. Ua opuahia taua ohipa ra i te matamua roa. I te m. 1880, ua faatia te hoê taata Farani, o Ferdinand de Lesseps to'na i'oa, i te hoê sotaiete ia tapu i taua fenua ra ei e'a pahi. Haamata ihora ratou i te ohipa, manuïa rii a'era. Area râ, i te m. 1888, ua pau to ratou moni, e ua tamata De Lesseps ia noaa i te moni apî; aita râ i manuïa ia'na, e ua faarue ihora oia i to'na toroa faatere i te ohipa, e ua ere ihora te sotaieti rave ohipa. Ua pau te moni e 500,000,000 dara i taua ohipa ra, aita râ i oti roa te reira.

Aita roa i moe te ohipa ta De Lesseps e ta'na ra sotaiete i rave na. I te m. 1892, opua ihora te hau Amerika ia tapu i te hoê e'a pahi i taua fenua ra o Panama. Ua hoo maira te sotaiete Farani no De Lesseps i te mau ohipa ta ratou i rave na i taua fenua ra, i te hau Amerika. Teie te moni ei hoo no taua ohipa ra, oia hoi 40,000,000 dara. E ua horoa noa te hau Panama i te hau Amerika i te hoê tufaa fenua e 50 maile i te roa, e e 10 maile i te aano, ia hamani ratou i te hoê e'a pahi i taua fenua ra. I te mahana 26 no Febuare, 1904, ua faatiahia e rave ratou i taua ohipa ra. E i te avae Me, 1904, haamata ihora te hau Amerika i te hamani i taua e'a pahi ra, e te rave noa nei ratou i te ohipa i reira i teie nei â. E te mana'o nei ratou e, e oti ai taua ohipa ra i te m. 1915. Ua horoahia te moni e 50,000,000 dara e te hau Amerika ei hooraa i te mau faatiaraa ia rave i te ohipa i reira, e ua pau hoi te moni e 210,070,468 dara i te raveraa i taua ohipa ra. Te rave nei e 30,000 taata i te ohipa hamani i te e'a pahi i teie nei.

Teie te faito o taua e'a pahi ra, oia hoi e 50 maile i te roa, e e 500 pie i te aano, e e 55 pie i te hohonu. E tae atu hoi te e'a i nia i te hoê aivi e 85 pie i te teitei. Tei nia teie nei aivi te hoê roto rahi e 25 maile i te roa, o Gatun te i'oa. E tae atu te mau pahi i teie nei roto na roto i na opani e toru i te pae Patitifa, e na opani e toru i te pae Atalanita. Mai teie te huru o taua mau opani ra: Ua patuhia te hoê aua ofai e 1,000 pie i te roa, e e 110 pie i te aano, e e 29 pie i te teitei. Tei te hoê pae i taua aua ra te hoê opani rahi. E e tere te pahi na roto i te opani i roto i te aua. Ei reira, opanihia te opani, faaïhia te aua i te pape; e na te pape e faateitei i te pahi i nia, e e tere noa oia i roto i te opani i mua, ei reira e faateitei-faa-hou-hia e tae i nia roa.

Eiaha roa te feia no teie nei pae fenua moana e mana'o e, e pau teie nei fenua i te miti rahi ia oti taua e'a pahi ra, no te mea e 23 pie te teitei o te moana Patitifa i nia a'e i te moana Atalanita, no reira aita roa e pea-pea i te reira. E ohipa rahi roa ia te reira, e te maitai rahi hoi; e ia oti a'era, e riro ia ei haamaitairaa i te mau fenua moana, e i te ao atoa nei.

---

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.